

Ya'a tse'e je mumejtsk nak juu' ve'e je Pablo tyuknuja'yi je Timoteo

1 Atse'e je Pablo, je Nte'yamts atse'e xvinkoon jets atse'e n'itut je Jesucristo je kyukátsiva je'e kajx jets atse'e n'avánat je joojntykin juu' ve'e xa'ma kajx ijtp, je'e tse'e xtukvinva'nimdu ya joojntykin juu' ve'e yakjayejpp ku ve'e je jayu y'it to'k muk je Jesucristo maat. ²Timoteo, ooy ats mitse'e ntuntsak, n'onukja'vipts ats mitse'e je'e kajx ku ve'e xjaanchja'vi'ukvaajñ je Jesucristo ku atse'e x'amotunajxy. Je Nte'yam, juu' ve'e nTee'imdup, jets je nMaja Vintsánamda Cristo Jesús, je'e tse'e mkunoo'kxjadap jetse'e m'ijtnit je tyukmo'tun maatta jets je y'oy joost maatta.

Vaajnja tse'e anañujoma je jayu
je oy kats je oy ayook

³Je va'ajts vinma'yun maat atse'e nvinjava nvintsa'aga je Nte'yam, ve'em ax jo'n dutoonduva uu'm je njupit jáyuvamda. Jóvum xaaj jóvum tsooj atse'e je Nte'yam nkukajtsja mits kajx ku atse'e ntsapkats. ⁴Njaal'myejtsp atse'e vintso ve'e je mvinnaq vyajntyk. Ooyts atse'e ntuntsak jets ats mitse'e n'íxnuvat jets atse'e ve'em

ooy ntunxqondukut. ⁵Njaal'myejtsp atse'e vintso ve'e to'k joot xjaanchjáva je Nte'yam, ve'em ax jo'n dutoonduva je m'ok Loida jets je mtaak Eunice. Vinjava atse'e ntañ jets ve'emna mitse'e xjaanchjáva uxyam paat. ⁶Je'e kajxts ats mitse'e ntukjaal'myeéts jetse'e xjaal'kyaknuyókat je maa'yun je putajkin jetse'e ve'em je jayu xjaal'ktuknuja'vi'ata'atsut je Nte'yam je y'ayook, je maa'yun je putajkin juu' ve'e je Nte'yam mmoojyju ku ats mitse'e ya nka'aj ntuknukaajn. ⁷Kux je Espíritu Santo, juu' ve'e je Nte'yam xmo'yumdu, ka je'e kajxaps je'e ve'e xmo'yumdi jetse'e je jayu x'atsa'kimdat, je'e kajxe'e jetse'e njayejpumdinit je makk aaj je makk joost jets je tsojkun, jetse'e nnay'akuvaa'nimjidinit. ⁸Ka'a tse'e xtuktso'otyónut jetse'e je tuvakojtsun xpámút je nMaja Vintsán kajxamda. Ka'ats ats mitse'e xtuktso'otyoocompat ku atse'e yap poxuntujkp n'it je'e kajx, ñojk'óye'e je Nte'yam je myakkina kajx xtukmaatjayéput je jaanchja'vivatajk je tsachpaatun juu' ve'e jéjip ku ve'e je jayu yakvaajñja je oy kats je oy

ayook. ⁹Je Nte'yam xa ve'e xyaktsookumdu, xyaaxjimduts uu'm je'e ve'e jetse'e njoojntykimdat vintso ve'e yakmaja yakjaancha y'ijtnit. Ka je'e kajxap tse'e xyaktsookumdi kux'e juu' nto'numdi, je'e ve'e ku ve'e ve'em viinm dñunupajmtki jets je'e kajxpa ve'e kux'e je maa'yun xtoojnjimda je Cristo Jesús kajx, je maa'yun juu' ve'e xtuknupajmtkimdu van'ítani ku ve'e ya it kyatsoo'ndukna vye'na. ¹⁰Ax ya maa'yun tse'e nuke'xnatajki ku ve'e myiijn je Nyaktsookpamda Jesucristo, je'e tse'e duyakkutoki je oo'kun jetse'e je jayu dutuknuja'vi je joojntykin juu' ve'e xa'ma kajx ijtp. Je oy kats je oy ayook kajx xa ve'e nnuja'vimda vintso ve'e njayejpumdinat ya joojntykin. ¹¹Nay je'e kajxpats atse'e je Nte'yam xpuujm ka'amaayva, kukátsiva, jets yak'ixpajkpa. ¹²Je oy kats je oy ayookts atse'e nkutsaachpaadip, ax ka'ats atse'e ntukts'o'otyún, kux tyuva atse'e nnaya'vijini jets jem atse'e je Jesucristo y'am kya'm nmapyaajmjí, nay tyúvats atse'e nnaya'vijini jets jyayejjp je'e ve'e je kutojkun jetse'e du'ix'ijtnit juu' ats je'e ve'e xtukkatajki. Van'it paat tse'e ve'em dutónut ku ve'e myiinnuvat.

¹³Panajkxu je tuv ixpajkun, ve'em ax jo'n atse'e x'amotunajxy. Ve'em tonu je jaanchja'vin maat jets je tsokun maat juu' ve'e je Cristo Jesús xmo'yumdup. ¹⁴Va'ajts tse'e xyak'itut jetse'e je jayu xtuk'ixut je tuv ixpajkun juu' ve'e myakmooy. Je Espíritu Santo, juu' ve'e ijtp yam nja'vin kajxmamda, je'e tse'e mputákajap jetse'e ve'em xtónut.

¹⁵Xmasoooktinuts atse'e nujom pan pan jatye'e tsuunidup jem ásiait y'it joottm, ax xnujava jo'n, numejtsk je'e ve'eda juu' ve'e duxaqjidup Figelo jets Hermógenes. ¹⁶Je Maja Vintsane'e dutukmo'otup je Onesíforo maat pan pan jatye'e tsuunidup jep jyuump tyujkp, kux may nax ats je'e ve'e xyakjot'amaji jets atse'e xkatukts'o'otyuujn ku atse'e yap poxuntujkp n'it. ¹⁷To'k aaj to'k jootts atse'e x'ixti ku ve'e vye'na yaja rómaít cysiudaaj kujx, ka'ajam atse'e x'ixti'atubi vi'nám atse'e xkapaa'ty. ¹⁸Je Maja Vintsán tse'e tukmo'otjup je xajku ve'e myiinnuvat. Oy xa mits je'e ve'e xnujava jets je'e atse'e ooy xtumpatto'ni jem éfesovit kyajpun kajxm.

Je'e pane'e je Jesucristo oy dumutoomp dumupajkp

2 Jets mits, juu' atse'e n'onukja'vip, pamu je makk aaj je makk joott je maa'yun kajx juu' ve'e je Cristo Jesús xtoojnjimdu. ²Je ayook juu' ve'e m'amotunajx jets atse'e jeja je numay jayu vyinkujk ntuk'ix, je'ets mitse'e je jayu mtuk'íxup pan pan jatye'e je tyuv je'e dutoondup jetse'e dujajttuvat vintso ve'e je viijnk jayu dutuk'íxtuvat.

³Ve'em ax jo'n to'k je oy tojpa dumutena je tsaachpaatun, nay ve'empats mitse'e xmuténivat je tsaachpaatun je Cristo Jesús kajx. ⁴Je tojpa juu' ve'e jep tyoonk jaatp ijtp, ka'a tse'e dutuktaka je toonk juu' ve'e je tojpa kyaje'eip, ve'eme'e dutún ax jo'n y'oyjávajat je'e juu' ve'e yaktajkiju tojpa. ⁵Nay

ve'empa tse'e, pan pan jatye'e noomdup, nachqots'íxjudup, ukpu viijnk dkoo'yidup, óyame'e myaada'akta, ka'a tse'e dpakta pan ti ve'e ñkoo'yidup pan ka'a ve'e kyoo'yada ax jo'n tukpava'añ y'it jetse'e kyoo'yadat.⁶ Je yoova jayu, paatjupts je'e ve'e jetse'e mutoo'vajkp tyukkada'akjadat je trigo tajm.⁷ Payo'oyu oy juu' atse'e nkajtsp; je Maja Vintsán tse'e mtukvinjávajap nujom.

⁸ Jaa'myétsu jets je Jesucristo ve'e duyaknuke'xnatajki jets je Nte'yam je'e ve'e, je'e ve'e ku ve'e jyoojntykpajknova ku ve'e y'uk'aa'k. Yaknuke'xnatajkiva tse'e jets jayu je'e ve'e, je'e ve'e ku ve'e y'it je yakkutojkpa David je chaan je kyooj. Ya'a xa ve'e je oy kats je oy ayook juu' atse'e je jayu nvaajnjidup.⁹ Ya oy kats ya oy ayook kajx atse'e nmutena je tsaachpaatun, je'e paat jets atse'e yap poxuntujkp n'it ax jo'n atse'e kun'ijt to'k juu' ve'e je maja tokin dutoomp y'ijt. Ax je Nte'yam je kyats je y'ayook, ka'ats je'e ve'e je jayu to'k viijn duyak'it ax jo'n atse'e to'k viijn nyak'it, va'kxtk'ataatspts je'e ve'e may viijn.¹⁰ Nujom juu' jaty atse'e nmuténip je'e je y'o'yin kajxta pan pan jatye'e je Nte'yam vyinkoon, ax ve'em tse'e je Jesucristo yaktso'okjadat, to'k muk tse'e y'ijttinit je'e maat jetse'e xa'ma kajx jyoojntykidinit joma ve'e je majin.

¹¹ Tyúvamts ya'a ve'e ya kats juu' ve'e njaaanchja'vimdup:

Pan ijturndup tse'e ax jo'n kun'oo'kumdi je Cristo maat je'e kajx ku ve'e to'k muk n'ijturnda je'e maat,

xa'ma kajxts uu'm je'e ve'e nmaatjoojntykimdinit;¹² pan je'e maatts uu'me'e ntsaachpaatumda, je'e maats uu'me'e nyakkutojkumduvat; pan ka'ats uu'm je'e ve'e nnatyukpajkumjada, ka'ats uu'm je'e ve'e xnatyukpajkumjuduvat;¹³ pan ka'a tse'e nkutyo'numda je y'ayook, kyutyuumpts je'e ve'e juu' ve'e kyajtsp, kux ka'a xa ve'e nvaat vimpit dutónut juu' ve'e kyajtsp. Jiduum xa ya'a ve'e ya kats.

Je mutoompa je mupajkpa juu' ve'e je Nte'yam y'oyja'vip

¹⁴ Tukja'a'myétssta je jaanchja'vivatajk juu' atse'e tunja'a. Tukpava'anda jeja je Maja Vintsán vyinkujk jets ka'a ve'e ñatyukkojtsvintsóvjadat oyjuu' kats ayooka juu' ve'e kyapaatyp kyah'akeeguip maat je tyuv je'e, ni vinxupa xa je'e ve'e kyato'nuxjada ku ve'e ñakyojtsvintsóvjadada, koojyji ve'e je jayu duyakmejtsvinmáyda pan pane'e amotunajxtup.¹⁵ Pan vinxupe'e m'o'yixju, je'e tse'e mtónup juu' ve'e je Nte'yam y'oyja'vip, ve'em ax jo'n to'k je toompa juu' ve'e dutoomp juu' ve'e je vyintsán y'oyja'vip jets ka'a tse'e tii juu' ve'e tyuktso'otyuump. Oy yakxone'e xkojtsva'atsut je tuvukats je tuv ayook.¹⁶ Ka'a tse'e x'itumo'ot je kats je ayook juu' ve'e kyapaatyp kyah'akeeguip maat je tyuv je'e, kux pan pan xa ve'e ve'em dukojtstup, yakvintsa'kintoki'ataa

tstupts je'e ve'e je Nte'yam. ¹⁷Juu' jaty tse'e je jayu tyuk'ixpajktup, ve'em tse'e yo'oy ax jo'n je pa'am juu' ve'e je jayu du�akma'tp. Numejtsk je'eda juu' ve'e ve'em duযakva'kxtktup je ayoook, je Himeneo jets je Fileto. ¹⁸Too'tókidu xa je'e ve'eda, ve'em tse'e je jayu dутuk'ixta jets ka'a ve'e je oo'kpatajk y'ukjoojntykpajktinuvat. Ax jem tse'e je jaanchja'vivatajk juu' ve'e yakvinmamya'ttu maaqat je y'ixpajkunda. ¹⁹Ax je Nte'yam tse'e xpaajmjimdu yam nja'vin kajxmamda je jaanchja'vin juu' ve'e tam xyak'ijtumdup je'e maaqat. Ve'em xa ya'a ve'e ya jaanchja'vin ax jo'n je ayoook juu' ve'e vaamp: "Y'ixa xa ve'e je Maja Vintsán pan pan jatye'e jye'eip", jets nay jidu'umpa: "Nujom tse'e pan pan jatye'e du'ava'nidup jets je Cristo je jyayu je'e ve'eda, va'an tse'e dumasooktini nujom juu' jatye'e ka óyap." Jidu'um tse'e vya'añ.

²⁰Joma ve'e je oy tajk, ka je apajkinjyaps jepe'e juu' ve'e oro jets juu' ve'e plata, jeppa ve'e juu' ve'e kup jets juu' ve'e naax, jep tse'e juu' ve'e je ñumajin maaqat yaktuump, nay jeppa tse'e juu' ve'e ka je ñumajin maaqat yaktuump. ²¹Ve'em xa uu'me'e n'ijtumda ax jo'n je apajkin juu' ve'e ijtp joma ve'e je oy tajk. Pan naajkvaatsumjudups uu'me'e jetse'e nmasookumda nujom juu' jatye'e ka óyap, ve'em tse'e n'ijtumdat ax jo'n je apajkin juu' ve'e je jayu je ñumajin maat yaktuump, apaamduka tse'e n'ijtumdat jetse'e nto'numdat pan ti ve'e je Maja Vintsán chajkp.

²²Ka'a tse'e mnamyaso'okjut jetse'e myakkutojkuxjut je vinma'yun juu' ve'e je muutskit ónuк jyayejptup ku ve'e jyomvinmayda tyivinmayda; panajkxu je tyuv je'e, je jaanchja'vein, je tsojkun, jets je oy joot. Panajkxu je'e maaqat nujom je'eda pan pan jatye'e va'ajts aaj valajts joot dujaanchja'vidup je Maja Vintsán. ²³Ka'a tse'e x'itumo'ot pan pan jatye'e nakyojtsvintsoojvjudup je ayoook kajx juu' ve'e kyapaatyp kyah'akeeguip, mnuja'vip xa mitse'e jets koojyji ve'e je jayu duযaknacho'oxpúkjui. ²⁴Kux je Maja Vintsán je myutoompa je myupajkpa, ka'ats je'e ve'e pan dumaaqtnacho'oxpúkjui, oy jayu ve'e ñapyumju anañujoma je jayu maaqat, jyajtype'e je yak'ixpajkk, myuténipe'e juu', ²⁵nuu'k aaj nuu'k joote'e dutukmaaqtkojs'óya pan pan jatye'e duts'oexpajktup je Nte'yam je y'ayook, jetse'e du'ix vintso ve'e je Nte'yam yakvinmayumpítjut, vintso ve'e dukuvákut je tyuv je'e, ²⁶jetse'e vyíjut kyéjut, ve'em tse'e dутukva'atsut joma ve'e je ko'oyjáyuvap yak'ituv'añju jetse'e tyuktonuvalañju juu' je'e ve'e chajkp.

Vintso je jayu vye'nat ku
ve'e je Cristo myiinnuvat

3 Nujava ya'a, ooye'e je jayu tyuntso'oxpaa'ttat ku ve'e tyáminit je itakax. ²Viinmji ve'e je jayu ñachókjadat, ñas'ayóvadap tse'e juu', namyájajadap, natyijjadap, kojts'anáxtap, ka'a tse'e du'ukkatsupajktinit je tyee' je tyaak, ka'a tse'e du'ukkejxtktinit,

ka'a tse'e je Nte'yam duvinjávadat duvintsa'agadat,³ ka'a tse'e dujayéptat je tsokun, ka'a tse'e jyot'oyava'andat, nuvampéttap tse'e, ka'a tse'e ñay'akuvaa'najadat, mu'ukivimpíttap, cho'oxpáktap tse'e nujom juu' jatye'e oy,⁴ pyámdap tse'e je jayu juu' ve'e tsokjudup jem je'e kya'mda juu' ve'e tso'oxpajkjudup, ka vintúvap tse'e juu' dutóndat dukótstat, ñutúvadap, ka'a tse'e je Nte'yam dutsóktat, je'e ve'e pyanajkxtap vintso ve'e viinm ñatyukxoondukjadat,⁵ naajkke'lexuva'anjadap tse'e ax jo'n je Nte'yam kudúvinja'vidi kudúvintsa'kidi, ax ka'a tse'e jem je Nte'yam y'am kya'm ñapyámjadat.

Ka'a tse'e m'lítút je'e maatta pan pan jatye'e ve'em.⁶ Kux jeme'e juu' ve'e je taay dumutajkidup joma ve'e je jayu ñay'amókajada, tyukvin'a'ndup tse'e je y'ixpajkun je ta'axtajk juu' ve'e oy dukanuja'vidup je Nte'yam je y'ayook jetse'e y'itta tokin maat.⁷ Je ta'axtajkta, xa'ma tse'e dutoonkada juu' ve'e y'ixpajktup, ax ni vin'ita tse'e dukatukje'yada je tyuv je'e.⁸ Ve'em ax jo'n je Janes jets je Jambres dutso'oxpajkti je Moisés, nay ve'empa tse'e je jayu dutso'oxpajktuva je tyuv je'e, ka'a tse'e je oy vinma'yun dujayepa jets ka'a tse'e je jyaanchja'vin dupaa'ty du'akeega maat je tuv jaanchja'vin.⁹ Ax ka'a tse'e xa'ma y'óyatad, kux nuke'xnatáka ve'e tyánut vintso ve'e je jayu duvin'a'nda, ve'em ax jo'n jyajtti je Janes jets je Jambres juu' ve'e je Moisés dutso'oxpajktu.

Juu' ve'e je Pablo

tyukpavan'ux'ookinu je Timoteo

¹⁰ Ax mnuja'vipts mitse'e juu' atse'e je jayu ntuk'ixp, vintso atse'e

njáyuva njoojntyka, vintso atse'e nujom je jayu ntsak, juu' atse'e ntonuvaampy nkotsuvaampy, juu' atse'e njaanchja'vip, juu' atse'e nmuténip,¹¹ juu' kajx atse'e nyakjomtún nyaktitún, juu' atse'e nkutsaachpaadip. Mnuja'vivapts mitse'e nujom vintso atse'e je jayu xjomtuujn xtituujn jem toojk kajpuñ kajxm, jem Antioquia, jem Iconio, jets jem Listra, jets vintso atse'e ntsaachpaaty ku atse'e jem nyakjomtuujn nyaktituujn. Ax je Maja Vintsants ats ya'a ve'e nujom xtuknuvaats.¹² Tyúvam xa ve'e jets nujom pan pan jatye'e joojntykavaandup va'ajts aaj va'ajts joot je Cristo Jesús kajx, yakjomtoondup yaktitoondupts je'e ve'eda.¹³ Je jayu juu' ve'e ko'oyjoojntykidup jetse'e je jayu duvin'a'nda, ve'ems ts je'e ve'e ñajkxtat ñáxtat, ve'eme'e je jayu duvin'a'ndat ve'em tse'e je jayu vyin'a'njuduvat.

¹⁴ Ax mits, pamu je makk aaj je makk joot je'e kajx juu' jatye'e mnul'ixpajki jetse'e xjaanchjáva. Mnuja'vipts mits je'e ve'e jets pane'e mtuk'ixju.¹⁵ Van'ítani ku ve'e pi'knum mve'nna, van'it tse'e xnuja'vi'ukvaajñ juu' ve'e ijtp jep Kunuu'kx Jatyán kujxp, ax je Kunuu'kx Jatyán kajx tse'e m'o'yixju jetse'e mvíjut mkéjut, ve'em tse'e xnujávat vintso ve'e yakjayéput je joojntykin juu' ve'e xa'ma kajx ijtp, je joojntykin juu' ve'e yakjayejpp ku ve'e je Cristo Jesús yakjaanchjáva.¹⁶ Nujom je Kunuu'kx Jatyán, je Nte'yamts je'e ve'e je jayu je vinma'yun dumooy, toompts je'e ve'e jetse'e je jayu

yaktuk'íxut je tuv jaanchja'vin jetse'e yaktuknaajmat ku ve'e duttún juu' ve'e ka óyap. Toompapts je'e ve'e jetse'e yaktukvinjávat je tyókin jetse'e yaktuk'íxut vintso ve'e tuv jyoointykat, ¹⁷ve'em tse'e je Nte'yam je myutoompa je myupajkpa pu'uk avaada y'ijtnit jetse'e ve'em duttónut dukkótsut nujom juu' jatye'e oy.

4 Je Nte'yam jets je Jesucristo, je Jesucristo, juu' ve'e miinnup yakkutojkpa jetse'e je jayu dutokimpayo'ynit juu' ve'e jooointykidup jets juu' ve'e aq'kanda, jéjats ats mitse'e je'e vyinkujkta ntukpava'añ. ²Tukka'amáyu je Nte'yam je kyats je y'ayook. Pan y'amotunaxuvaandup tse'e, uk pan ka'a, ni vin'ítats mits je'e ve'e xkatukka'amay'atúvat. Kojtsvíju je jáyuda juu' ve'e je Nte'yam je y'ayook dukkuvakuvandaandup, tuknaajma je jáyuda juu' ve'e je Nte'yam duyavintsa'kintókidup, kojtsja je jáyuda jetse'e to'k aaj to'k joot dujaanchjávadat je Maja Vintsán, jets mutenikqxu nujom juu' jaty ku ve'e ijtp xtuk'ix je oy kats je oy ayook. ³Kux je'yape'e je xaaj ku ve'e je jayu dukqo'kmuténidinit je va'ajts ixpajkun, y'íxtadapts je'e ve'eda pan pan jatye'e tuk'íxjadap juu' ve'e y'amotunaxuvaandup, ⁴ka'a tse'e du'amotunaxuval'andat je tyv je'e, je'e ve'e myajapámdap juu' ve'e je jayu myutaayvaattup. ⁵Ax mits, viji kej tse'e xa'ma mnaajk'ítjut, mutena je tsaaachpaatun, tukka'amáyu je oy kats je oy ayook, tonkaxu oy je mtoonk.

⁶Ax ats, je yax jo'nts atse'e nyakpam'ukvaanni, támínupe'e

ats je n'oo'kun, ⁷távani atse'e nmäqda'aky, ve'em atse'e ax jo'n je jayu juu' ve'e tujye'ya joma ve'e kyukaxa je noomk, ka'ats atse'e tunmasa^lák je tuv jaanchja'vin. ⁸Ax uxyam, je o'yints atse'e n'a'lixp jem tsapjoootm kux tuv atse'e tunjáyuva tunjooointyka, je o'yin juu' atse'e xmooynup je Maja Vintsán ku ve'e myiinnuvat, je'e juu' ve'e tókimpayo'yp ax jo'n d^upaa'ty du'akeega. Ax ka átsjyapts je'e ve'e xmo'op, yakmooyduvap je'e ve'e nujom pan pan jatye'e d^utsojktuvap jetse'e myiinnuvat.

Juu' ve'e je Pablo chojk jetse'e je Timoteo d^utónut

⁹Yakvinkopka jets ats mitse'e tsojk min xku'ix. ¹⁰Xmasooknu atse'e je Demas kux je'e ve'e chojk je naxviijin it kyo'oy je'e, jem Tesalónicats je'e ve'e ñajkxni. Ax je Crescente, jemts je'e ve'e galáciait y'it jootm ñujkx; je Tito, jemts je'e ve'e dalmáciait y'it jootm ñujkx.

¹¹Ya Lúcasji ve'e Yam ats maat. Najkxu xvavu je Marcos jetse'e xmaatmínut, kux xputajkip ats je'e ve'e jeja je Nte'yam tyoonk jaat.

¹²Je Tíquico, jem atse'e éfesovit kyajp^un kajxm nkejx. ¹³Ku ve'e mmétsut, myakmínup tse'e to'k aaj je vituni'kx juu' atse'e nmasook jeja je Carpo tyak'aajy jem trooasit kyajp^un kajxm, nay ve'empa ats je nnak jets ats je n'ak axaa'ch joma ve'e juu' jaty javyet, vinkopk je ak axaa'ch.

¹⁴Ooy xa atse'e je pojxun ka'tspa Alejandro xtuntsaachtuujn. Je Maja Vintsants je'e ve'e tukkuvéjtup je ka óyap kajx juu' ve'e tyoon.

¹⁵Nay'ixjü mits je'e kajx, kux ooye'e dütuntso'oxpük jé oy kats je oy ayook juu' ve'e n'ava'nimdup.

¹⁶Ku xa ətse'e muto'k nax nmakyukojsji jeja jé yakkutojkpa vyinkujk, ni pánats ətse'e xkaputajki, nujom atse'e xmasokkajxti. N'a'ixpts atse'e jetse'e je Nte'yam kyatukkuvéjtadat je'e kajx. ¹⁷Ax je Maja Vintsants ətse'e xputajki, je'ets ətse'e je makkin xmooy, ve'emts ətse'e je jayu va'ajts nvaajnjidi je Nte'yam je kyats je y'ayook, je'e paat jetse'e du'amotunajxtuva nujom je jayu juu' ve'e ka je israeejlitap. Je Maja Vintsants atse'e xjayejp x'axajtojk jets ətse'e ve'em nkatsaachpaaty juu' ətse'e x'uktukmutsojktu pən pan jaty ətse'e xtso'oxpajktu.

¹⁸Je'ets ətse'e xjayépup x'axajtókup pən ti ve'e tónjup kótsjup, ve'emts

ətse'e xyakje'ynit joma ve'e yakkutuk jem tsapjootm. iYakmaja yakjaancha tse'e y'ijtnit xa'ma kajx!

Ku je Pablo máyam je Dios dukejx

¹⁹Máyame'e to'k aaj je Dios xmo'ot je Prisca jets je Aquila maat je'eda pən pən jaty'e tsuñnidup joma ve'e je Onesíforo je jyaajn je tyajk. ²⁰Jem xa ve'e Corinto tyaaajñ je Erasto. Je Trófimo, pajkjupts ətse'e nmasaq jem Mileto. ²¹Yakvinkopka jetse'e mmínut namka'ana je xox aats dupaa'ty. Máyame'e je Dios mkejxuxjada je Eubulo, je Pudente, je Lino, je Claudia, jets anañujoma je utsta je ajchta maat je utsta je tsa'ada.

²²Je Maja Vintsán Jesucristo tse'e y'ijtnit mits maat jets miitse'e anañujoma mkunoo'kxjadat.